



Nos Himno

Un dia na aña 1952, Juan Chabaya (Padu) Lampe a yega cerca Rufo I. Wever cu e idea pa nan compone un cancion cu ta expresa e amor di nos pueblo pa su isla. A surgi e pregunta si lo crea un cantica den ritmo di marcha of wals tipico. Nan a scoge pa un melodia cu por interpreta den tur dos ritmo. E mesun dia e composicion "Aruba Dushi Tera" a keda cla consistiendo di dos couplet.

Den ritmo di wals el a haya mas popularidad dor di De Trupialen cu a hinc'e den nan repertorio. Muchanan di scol tabata cant'e y tambe na aubadenan pa Aña di La Reina y na ocasionnan oficial di Gobierno tabata uza "Aruba Dushi Tera".

E popularidad a bira mas grandi ora cu na 1954 riba iniciativa di Frère Alexius, Radio Kelkboom a grab'e riba un disco 78 rpm canta pa De Trupialen, bou direccion di Frère Alexius y acompaña na piano pa Padu Lampe. Na un forma espontaneo otro instancianan priva y oficial a cuminsa us'e na ocasionnan importante.

Durante e mesun aña dos radio a toca "Aruba Dushi Tera" den ritmo di marcha. E compositor sin embargo a haya e impresion cu e ritmo di wals a cai mucho mas na agrado di nos hendenan.

Dia 19 di september 1975, e conocido tenor Rufo Odor, respalda pa su coro Vivons en Chantant a interpret'e den ritmo di marcha na inauguracion di e edificio nobo di Parlamento di Aruba.

Como parti di e movimiento pa Status Aparte, Gobierno Insular a cuminsa traha riba un propio bandera y himno pa Aruba y dia 21 di januari 1976 a instala un comision cu mester a duna conseho pa obtene un himno nacional. E miembronan tabata Rufo Odor, Padu Lampe, Rufo Wever, Eddy Bennett, Hubert Booi y Maybelline Arends-Croes y asisti pa secretario di Gobierno Epi Wever.

E comision mester a atende e preguntanan: 1. Ta na su lugar pa "Aruba Dushi Tera" bira e himno nacional di Aruba? 2. Den caso afirmativo, den cua ritmo e mester ta; wals (3/4) of marcha (2/4)? 3. Y den caso no-afirmativo, si e comision por a presenta sugerencia pa obtene un himno nacional.

Durante un votamento secreto e comision a recomenda unanimamente "Aruba Dushi Tera" den ritmo di wals modera (mahestuoso) como himno nacional, manera e pueblo a costumbra cu ne.

E autornan a propone pa añadi un couplet na e composicion original cu ta elogia e cordialidad di e pueblo di Aruba y su amor pa libertad. E comision a acepta e idea y tanto Padu Lampe conhuntamente cu Rufo Wever, como Hubert Booi a entrega un proposicion. Den presencia di henter e comision Hubert Booi a combina e dos proposicionnan den un solo couplet cu a bira e di tres couplet.

E comision a entrega su recomendacion dia 25 di februari 1976 y dia 16 di maart 1976 Consejo Insular di Aruba a aproba "Aruba Dushi Tera" como himno di Aruba.

Na Caracas a graba pa prome biaha y na un forma oficial e himno nacional di Aruba cu e coro Vivons en Chantant bou direccion di Rufo Odor cu e orkestra sinfonico di Venevision bou direccion di e maestro Anibal Abreu.

Dia 18 di maart 1976, durante un acto oficial den Wilhelmina Stadion, a proclama "Aruba Dushi Tera" como e himno nacional di Aruba. E coro hubenil Tutti Frutti bou direccion di Maybelline Arends-Croes, acompaña pa e orkestra harmonico, dirigi pa e conocido musico Joy Kock, a percura pa e prome interpretacion oficial den publico.



Nos Bandera

E pueblo di Aruba, apesar di su anhelo pa dicidi su propio destino pa mas di mei siglo, nunca antes a propone su mesun bandera.

Gobierno Insular di Aruba a instala un comision dia 21 di januari 1976 cu a haya e tarea pa organisa un concurso pa haya un diseño pa un bandera di Aruba. E comision tabata consisti di señores Julio Maduro, hefe di Departamento di Asuntonan di Labor; Wouter van Romondt, docente di dibuho na Colegio Arubano; Ronald Dunk y Juan E. Wever como secretario. E comision a ricibi un total di 693 diseño.

Den e diseñonan por a mira diferente similaridad manera un strea di cuatro punto, liñanan sea horizontal of vertical. E colornan dominante tabata cora, blanco, blauw y geel.

E bandera oficial no a keda escogi for di e contribucionnan, pero e comision a dicidi di acerca Flag Research Institute na Boston pa yuda cu un diseño y presenta esaki na Gobierno y Parlamento. Dia 16 di maart 1976, Parlamento di Aruba a aproba e diseño cu lo bira e bandera oficial di Aruba. Dos dia despues, dia 18 di maart, e bandera di Aruba a keda inaugura durante un celebracion grandi den Wilhelmina Stadion.

E color blauw di e bandera ta representa e lama inmenso cu ta rondona nos isla. E bandera ta simbolisa tambe cu e isla ta anhela di ta soberano of independiente, pero e no kier isola su mes for di otronan cu ta rondon'e.

E strea di cuatro punta ta simbolisa e cuatro direccionnan di kompas; for di mas cu cuarenta pais hendenan a bini Aruba y forma un comunidad cu ta biba den harmonia cu otro.

E color blanco ta simbolisa e santo di lama y e puresa den curason di nos habitantenan.

Geel ta e color di abundancia y e liñanan horizontal ta muestra e solididad di tal abundancia.



Nos Escudo

E escudo di Aruba ta den uzo oficial desde 15 di november 1955 riba cual fecha Parlamento di Aruba a aproba e escudo pa medio di un decreto inculca:

Originalmente e diseño basico di e escudo tabata un creacion di e Atelier voor Heraldische Kunst estableci na Amsterdam, Hulanda.

Durante un concurso pa escudo organisa pa Gobierno Insular y anuncia den corant dia 27 di maart 1953, e tayer Hulandes di arte a presenta un diseño cu a keda selecta for di e diferentenan cu Gobierno a haya. Ariba e diseño aki, sin embargo, Gobierno di Aruba a haci dos cambio cu aprobacion di e Atelier voor Heraldische Kunst pa e por refleha mas ainda e simbolonan di Aruba.

E cambionan ta den e promer y den e di dos cuartel di e escudo. Mientras cu e tayer Hulandes a pinta e solo den e promer cuartel, Gobierno a cambiele pa un mata di aloë. Den e di dos cuartel originalmente e tayer Hulandes a pinta e cero di Jamanota; Gobierno di Aruba a cambia esaki pa e cero di Hooiberg.

Segun e reglanan di e concurso, e diseño a bira propiedad di Teritorio Insular di Aruba y e escudo aki ta esun oficial di Aruba manera el a keda aproba pa Parlamento dia 15 di november 1955.

E escudo di un pais ta un simbolo cu ta refleha diferente aspecto tipico di e pueblo. Nos bunita escudo tambe tin su significacionnan: den e promer cuartel, e mata di aloë ta simbolo di e promer fuente di bienestar di nos isla. Den e di dos cuartel, e cero di Hooiberg ta simbolisa e isla di Aruba, cu ta surgi for di lama. E color berde ta duna, como color di alegria, expresion di e alegria pa e autonomia obteni. E liñanan ondeante ta representa nos lama.

Den e di tres cuartel, dunamento di man ta simbolisa e lasonan amistoso cu otro nacionnan y pueblonan, tanto riba tereno politico, economico y cultural. E color cora ta simbolisa e caracteristicanan generoso, di balor y di trabou riba cual e lasonan aki ta basa.

Den e di cuatro cuartel, e wiel ta representa e industria como fuente di bida mas importante di nos isla.

E cruz riba henter e escudo ta simbolisa devocion y fe. E leon ta representa forsa y generosidad, cual cualidadnan ta keda subraya pa medio di e color.

E ramanan di laurel ta simbolo di paz y amistad.



ARUBA

DUSHI TERA

